



U Roveru nađen skank

U okviru akcije Rover na području općine Mostar pripadnici **Državne agencije za istrage i zaštitu SIPA** uhapsili su tri osobe zbog sumnje da su počinile krivično djelo organizirani kriminal u vezi sa krivičnim djelom neovlašteni promet opojnim drogama.

Policijska je na području Stoca i Ljubuškog obavila nekoliko pretresa s ciljem pronalaska i privremenog oduzimanja predmeta koji mogu poslužiti kao dokaz u daljem postupku. Akcija je, kako navode u **SIPA**, provedena po naredbama Suda BiH i Tužilaštva BiH, u saradnji sa policijskim službenicima MUP-a Hercegovačko-neretvanskog

kantona i MUP-a Zapadno-hercegovačkog kantona.

Do sada je u okviru rada na ovom predmetu pronađeno i oduzeto oko devet kilograma skanka, kažu u ovoj policijskoj instituciji, gdje navode da su osumnjičene osobe sa njima poznatim osobama, iz Crne Gore nabavljale pomenutu drogu, a potom je distribuirale i preprodavale na području BiH i Hrvatske s ciljem pribavljanja protivpravne imovinske koristi.

Osumnjičene osobe su privedene u službene prostorije **SIPA**, gdje će biti obavljeno njihovo saslušanje, a nakon toga će biti predate Tužilaštvu BiH na dalje postupanje.